



Aqqalu C. Jerimiassen
Atassut

UKA 2020/91
19. november 2020

Illoqarfinni nunaqarfinnilu, immap tinittarnera ulerujussuarterneralu pillugit, angallatinut umiarsuarnullu talittarfiit qarsunneqartaleriartuinnarneri, isumannaannerusumik aaqqissuunneqarnissaat siunertaralugu, UKA2021-mut naammassereersimasussamik Naalakkersuisut pilersaarusicqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Bentiaraq Ottosen, Atassut)

15. november 2019 oqaluttuarisaanermi aatsaat taama annertutigisumik Ilulissani malissuarunarpoq iisaqusanneranik (iluliarsuup aserorneranit) pilersitaanngitsumik, ilaatigut allaat angerlarsiffinnit pingasuusunit inuttaasut allamut qimagutitikkallartariaqarneranik kingunilimmik, sorpassuillumi pisattat allarpasuillu aseruaiterneranik kingunilimmik.

Tassuunalu uppernarseqqiinnarujallaraarput pinngortitarput aqussinnaanatigu, allangoriartortuarneratali kinguneranik naleqqussartuarnissarput avaqqunneqarsinnaanngilaq, kingusinaartingatalumi iliuseqartariaqarluta ajortoqaratarsinnaanerali utaqqiinnarunnaalaarlugu.

Ajutoortoqareerpammi peqqissimineraasiit kingulliutilillarutsigu oqaaseq atorneqartariaqanngimmat; taamaalioreersimasariaqaraluarpummi.

Tamatta akisussaaffeqarpugut inuiaqatigut illersussallugit isumannaatsumik inuuneqarnissaannut, tassanilu sineriammi tamatta najugaqartuungatta ulinnertusineruleriartornera nalimmassaqqiffiginissaanut piaartumik iliuseqartariaqarnitsinni ataatsimoortumik periusissiaqartariaqarpugut isumannaatsumik inuusuaannaqqulluta.

Ukiut kingulliit malunnarneruleriartorpoq kiannerusarnerani arlalitsigut imartatsinnut imaannaanngitsumik kinguneqartarnera, takuarpummi Paamiunissaaq qanoq pisoqarnera, tamannalu maanna ersereersimalermat naleqqussartariaqarnitta pimoorulluinnarlugu aalluttariaqalersimaneranit ersiuteqartiiginnarpoq.

Nunarsuatsinni sapsiortarnerit, talittarfinnillu ulittarneranut tinittarneranullu immikkukajaaq naleqqussakkanik ilinniarfeqarniarsinnaavugut. Ajunaarnersuatummi ittunik nunarsuup ilaani misillertarsimanerminni sakkortungaartunik ilinniarfeqartarsimapput, naallu naalliunnartunik nalaataqarfigisarsimagaluaqalugit nalaatatik uterteqqikkusunnagit pisinnaasartik tamaat naleqqussartarsimapput qangaaniilli.

Maannaattaarlu ulinnerusalerneranit qeriuannartup innarleriartorusaarnerani nunap sisooratartarsinnaaneritaaq eqqummaariffeqartariaqaratta ajunaarnersuatummi ittunik nalaataqariataarnissaaq ingalassimatinniarlugu, maannami nunap sisoortalernerattaq



takusalereerparput nunatta ilaani, tamakku inuup inuuneranik naleqartariaqanngillat, maannangaaq piffissaatillugu iliuuseqarniarta.

Nalunngeriikannerisinnaangaluarparput Naalakkersuisut kingumut oqassaqaarumaartunaasiit suliat ingerlareermata una atorsinnaanngitsoq, taannali akissut ila naammaleraluarpoq, Inatsisartut sulinerat maanna annerusumik malinnangu ingerlareerneranni innuttaasut qitiutillugit iliuuseqarniarnermi utaqqisitseqqinnissaq pisariaqanngimmat.

Ulinnertusinerujartuinernerali kisiat eqqarsaatiginngikkaluarluguttaaq, tinittarnera aamma ukkatarisariaqarparput, tassami takusareerparput maanna sinerissami inoqarfiit ilaanni tinissimangaarmat talittarfiup ataanut pillutik nunataa imartaarulluni nuisimammattummaqqagaat. Tamakku isiginnaanginnarniarpagut? Ila angallannikkut tamakku tamarmittaaq isumaqarput, angallatinut ikiniartarnikkut sinerissatsinni isumannaattumik ulittarneranut tinittarneranullu aaqqiissuteqalertortariaqarpugut. Inuussutissarsiutimmi nunatsinni annersaat eqqartuleraagatsigu talittarfiit tulattarfiillu qitiunerpaasutut inissisimasarput, atungassarititaasullu ajunngippatattaq, tassani inuussutissarsiorfiusumi eqaannerusumik suleriuseqarnikkut suliat ingerlalluassammata. Innuttaasut qitiutillugit iliuuseqarniarta maannangaaq, pisussanik utaqqiinnassanngilagut, uagut inatsisiliortutut pisussaaffigaarput innuttaasut illersussallugit immitsinnut illersorniinnarata, taakkoqanngippammi maani isersimasinnaanissarput qularnartuummat.

Aaliagiiffissatut siunnersuut aataqqii Siverth K. Heilmann-imik siunnersuusiarineqarsimaasoq Bentiaaraq Ottosenimik kingornunneqartoq apeqquuserneqarsinnaanngilaaq qanoq pingaaruteqartiginera.

Tamanna pillugu siunnersuut ataatsimoorussamik suliarineqartariaqavinnera innersuupparput Atassummiit, ataatsimiitsitaliamilu suliareqqinneqartariaqarnerattaq innersuullugu.